



Siverth K. Heilmann

UPA 2024/112

Atassut

21. maj 2024

Ilageeqarnikkut qanoq siuarsaasinnaanerluta, oqaluffeqarfinnilu sulisut atugaat qanoq pitsanngorsarsinnaaneri pillugu apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Aqqalu C. Jerimiassen, Atassut)

Siullermik oqallissaarisooq Aqqalu C. Jerimiassen qujaffigerusuppara, imatullu Atassummiit naatsumik oqaaseqarfiggissavara.

Naak ullutsinni upperisaq ilageeqarnerlu amerlasuunut inituallaarunnaareeraluartoq suli nunaqqaterpassuaqarpugut inuunerannut pingaarutilittut inissisimasooq. Aamma amerlasuujusugut ulluinnarni upperisarsiortuunngikkaluarluta suli oqaluffimmi kuisitsisarpugut, apersortittoorluta katillutalu. Iisaasooqassatillugulu oqaluffik aamma pisariaqartittarparput.

Qinikkatut suli ulloq manna tikillugu ajoqiniit pattattuniillu saaffigineqartarpunga atukkatik assut iluarinagit. Soorunalimi misiliisarsimavunga pissutsit taakku aaqqiivigiumallugit, atorfillilli atugaannut tunngasut Inatsisartuniit aaqqiivigiuminaattarmata, suli aningaasanut inatsisissamiit aamma misiliisarsimagaluarpugut ajoqit, pattattullu atugaat pitsanngorsarusullugit.

Siunnersuuteqartullu eqqaasaa aamma uteqqilaaginnarsinnaavara, tassa sineriammi oqaluffiit aserfallassimaqisut, kiisalu sumiiffinni mikisuni amerlasuuni pattattussaartut Atassummiit tapersorsorpagut, maanilu inersuarmi, Naalackersuisuttaaq iliuuseqarsinnaanerput pimooruttariaqarparput.

Ilageeqarnermut Naalackersuisoqarnerput atorluartariaqarpoq, taaguutaannaassanngippat. Aserfallatsaaliinissamat ukiumoortumik tulleriiaarinertalimmik aningaasanut inatsisissamat piumasaaqateqarumalluta Atassummiit massakkut suaarutigaarput, neriullutalu partiit sinnerisa aamma taanna taperserumaaraat.

Taamatut naatsumik oqaaseqarluta siunnersuuteqartoq qujaffigaarput.